



Komunikadu Imprensa
22 Novembru 2021
Parlamentu Nasionál

**JSMP husu PN aprova proposta adisionál husi Tribunál, Ministériu Públiku,
Defensoria Públiku, CAC no PSIK iha OJE 2022 nian**

Komisaun A Parlamentu Nasionál halo ona audénsia públiku ho entidade sira instituisaun públiku Estadu nian hodi rona sira nia hanoin kona-ba planu orsamentu kada instituisaun ba tinan 2022 no mós progresu ezekusaun orsamentu jerál tinan 2021. Instituisaun hirak ne'e mak Tribunál, Ministériu Públiku, Defensoria Públiku (DP), Komisaun Anti Korrupsaun (CAC) no Polísia Sientífika Investigasaun Kriminál nian (PSIK).

Iha audénsia ne'e, representante sira husi instituisaun lima (5) ne'e nian hato'o mós sira nia preokupsaun kona-ba pakote orsamentu ne'ebé sira presija ne'ebé la inklui iha relatóriu Komisaun Revizaun Orsamentu hodi implika ba implementasaun atividade sira instituisaun lima ne'e ba tinan 2022, liu-liu iha verba kapitál minor no bens serbisu nian.

“JSMP konsidera proposta adisionál husi Tribunál, Ministériu Públiku, DP, CAC no PSIK importante atu Parlamentu Nasionál konsidera hodi aprova, atu nune'e bele tulun instituisaun sira ne'e hala'o sira-nia serbisu ho di'ak no efetivu liután iha área justisa nian, liuliu aseguara asesu ba justisa formál ba ema hotu nian”, dehan diretora Ezekutiva JSMP Sra. Ana Paula Marçal.

JSMP mós hanoin katak ho apoiu no vantade polítika Parlamentu nian ne'e la bele sai hanesan “retórica polítika” de'it ligadu ho programa reforma setór judisiáriu, maibé tenke liuhusi asaun polítika ida konkreta ho aloka rekursu orsamentu ne'ebé suficiente ba instituisaun hirak ne'e hodi bele tulun sira hodi funsiona no implementa sira-nia atividade ho di'ak.

Proposta orsamentu tribunál nian iha tinan 2022 ho nia total miliaun US\$7,091,187.00 ne'ebé sei fahe ba verba sira ho nia kategoria mak hanesan saláriu no vensimentu US\$3,606,288.00, bens no serbisu US\$2,602,899.00 no kapitál dezenvolvimentu US\$882,000.00 no proposta adisionál husi tribunál nian ho total US\$900,000.00 iha verba kapitál minór ne'ebé sei aloka ba ekipamentu tribunál sira nian hanesan mákina foto-kopia gravadór ba gravasaun simultania, ekipamentu informátika, kamera canon, projetór, mákina bomba bee no akizasaun mobiliáriu tribunál nian.

Proposta orsamentu Ministériu Públiku 2022 ho nia total miliaun US\$4,087,573.00 ne'ebé sei fahe ba verba sira ho nia kategoria mak hanesan saláriu no vensimentu US\$2,480,498.00, bens no serbisu US\$1,206,475.00 no kapitál dezenvolvimentu US\$400,600.00 no proposta adisionál husi Ministériu Públiku nian ho total US\$328,000.00 iha verba bens no serbisu US\$130.000.00 ne'ebé sei aloka ba manutensaun rezidénsia distritál sira nian, fornimentu serbisu operasionál no atendimentu reuniaun internasionál sira iha estranjeiru no US\$198.000.00 iha kapitál

minór hodi sosa ekipamentu eletróniku, mobiliáriu no mós sosa kareta ida ba adjunta Prokuradoria Jerál Republika.

Proposta orsamentu adisional Defensoria Públiku 2022 ho nia total UDS\$783.282.00 ne'ebe sei fahe ba kategoria bens no serbisu hamutuk USD\$100,000.00 ne'ebé sei fahe rubrika viazen lokal, pagamentu ba divida sira, manutensaun ba veiklu sira, fornesimentu material eskritóriu. Kapital minor USD\$145,000.00 sei fahe ba rubrika sosa veiklu no akuzasaun ba ekipamentu mobiliariu ba edifísiu Defensoria Públiku Bobonaro no Ermera no verba kapital dezenvolvimentu USD\$538,282.00 sei aloka ba rubrika konstrusaun edifísiu foun DP iha Vikeke no prepara dezeńu ba no BOQ ba edifísiu sentral DP nian.

Proposta orsamentu adisional Polísia Sientífika Investigasaun Kriminál (PSIK) ba tinan 2022 hamutuk USD\$137,079.00 ne'ebé sei aloka ba verba kapital minor hodi halo akizasaun ba ekipamentu mobiliariu sira, informatika mákina foto-kopia, UPS no seluktan hodi fasilita serbisu PSIK nian ba futuru.

Proposta orsamentu Komisaun Anti Korrupsaun (CAC) ba tinan 2022 ho nia total miliaun US\$1,884,440.00 ne'ebé sei fahe ba verba sira ho nia kategoria mak hanesan saláriu no vensimentu US\$973,966.00, bens no serbisu US\$878,834.00 no kapital minór US\$67,640.00 no proposta adisionál husi CAC nian ho total US\$748,416.00 iha verba kapitál minór hodi sosa ekipamentu informátika ba rejistu bens interese no ba bens no serbisu atu selu asesór sira no tékniku hodi tulun investigadór sira sira seluk tan inklui subsidiu ba transporte ba kargu xefia sira.

Entretantu husi instituisaun sira seluk ne'ebé parténsia ba Komisaun A nia área serbisu mós submete ona sira nia proposta adisionál mak hanesan Ministériu Administrasaun Estatal, Gabinete Apoiu Sosiedade Sivil, CHEGA, Arkivu Resistensia, CNE no STAE.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>
www.jsmp.tl

Rua Beco Lakateu, Aldeia Manufuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
ana@jsmp.tl
Facebook: www.facebook.com/timorleste.jsmp
Twitter: @JSMPtl.